

RREGULLORE PËR PËRCAKTIMIN E KRITEREVE TË VLERËSIMIT DHE TË PËRZGJEDHJES SË FURNIZUESIT TË MUNDËSISË SË FUNDIT

Miratur me Vendimin e Bordit të ERE-s nr. 141, datë 15.06.2021

NENI 1 QËLLIMI

- 1.1 Kjo rregullore përcakton kriteret bazë të vlerësimit si dhe procesin për përzgjedhjen e furnizuesit të mundësisë së fundit që i kërkohet të kryejë shërbimin e furnizimit në përputhje me nenin 86 të ligjit nr. 43/2015 “Për Sektorin e energjisë elektrike”, i ndryshuar dhe VKM nr. 449, datë 15.6.2016, “Për miratimin e kushteve dhe të procedurave për përcaktimin e furnizuesit të mundësisë së fundit të energjisë elektrike”.
- 1.2 Kjo Rregullore përcakton:
 - a. Procesin e përzgjedhjes së furnizuesit të mundësisë së fundit;
 - b. Detyrimet në lidhje me kushtet që kualifikojnë një të licencuar për të aplikuar dhe për t’u emëruar si Furnizuesi i Mundësisë së Fundit;
 - c. Kriteret e vlerësimit që do të përdoren për përzgjedhjen e furnizuesit të mundësisë së fundit pas një procesi konkurrimi;
 - d. Të drejtat, detyrimet dhe përgjegjësitë e aplikuesit si furnizues i mundësisë së fundit.

NENI 2 PËRKUFIZIME

Shprehjet që përdoren në këtë rregullore kanë kuptimet e mëposhtme:

- 2.1 **Enti Rregullator i Energjisë (ERE)** - është autoriteti rregullator i sektorit të energjisë, i cili funksionon në përputhje me ligjin nr. 43/2015 “Për Sektorin e Energjisë Elektrike”, i ndryshuar dhe ligjin nr. 102/2015 “Për sektorin e gazit natyror”, i ndryshuar.
- 2.2 **Furnizimi i mundësisë së fundit** - furnizimi i përkohshëm i klientëve fundorë, në kushtet e parashikuara në ligjin për sektorin e energjisë elektrike, të cilëve u sigurohet furnizim i përkohshëm brenda kufijve të përcaktuar me këtë ligj.
- 2.3 **Furnizuesi i mundësisë së fundit (FMF)** - është një furnizues i caktuar në përputhje me dispozitat e ligjit nr. 43/2015 “Për Sektorin e Energjisë Elektrike”, i ndryshuar, i cili ofron për një periudhë të kufizuar kohe shërbimin e furnizimit në kushte të rregulluara ndaj klientëve, të cilët nuk kanë mundur të kontraktojnë vetë një furnizues ose kanë humbur furnizuesin e tyre.
- 2.4 **Shërbim universal i furnizimit** - është një shërbim publik për furnizimin e klientëve fundorë, i cili siguron të drejtën e tyre për t’u furnizuar me energji elektrike të një cilësie të caktuar, brenda gjithë territorit të Republikës së Shqipërisë, me çmime të rregulluara, lehtësisht dhe qartësisht të krahasueshme, transparente dhe jo diskriminuese.
- 2.5 **Konkurs** - do të thotë tërësia e procedurave në vijim të një ftese të shpallur publikisht për aplikime për Furnizuesin e mundësisë së fundit, të organizuara sipas kushteve të përcaktuara në procedurën e përzgjedhjes së furnizuesit të mundësisë së fundit.
- 2.6 **Çdo përkufizim ose term tjetër** i përdorur në këtë rregullore, ka të njëjtin kuptim me atë të përdorur në ligjin nr. 43/2015 “Për Sektorin e Energjisë Elektrike”, i ndryshuar si dhe VKM

nr. 449, datë 15.6.2016 “Për miratimin e kushteve dhe të procedurave për përcaktimin e furnizuesit të mundësisë së fundit të energjisë elektrike.”

2.7 Ditë - në kuptim të kësaj rregulloreje, në çdo rast do të kuptohen ditët kalendarike.

NENI 3

FURNIZUESI I MUNDËSISË SË FUNDIT (FMF)

- 3.1** Një furnizues i mundësisë së fundit, siç përcaktohet në paragrafin 1, në pikën 8 të Kushtet dhe procedurat për përcaktimin e këtij furnizuesi në VKM nr. 449/2016 konsiderohet si personi i caktuar për të siguruar furnizimin e mundësisë së fundit me energji elektrike për konsumatorët familjarë dhe konsumatorët e vegjël jofamiljarë, sipas përcaktimeve të pikës 1, të nenit 86, të ligjit nr. 43/2015, “Për sektorin e energjisë elektrike”, i ndryshuar në territorin e Republikës së Shqipërisë për një periudhë 3-vjeçare, nga momenti i përzgjedhjes.
- 3.2** Në paragrafin 1, të nenit 86 të Ligjit nr. 43/2015 "Për sektorin e energjisë", i ndryshuar si dhe në VKM nr. 449 datë 15.06.2016, Furnizuesi i mundësisë së fundit ngarkohet me detyrimin për të furnizuar të gjithë klientët të cilët mbeten pa furnizues, për një periudhë të kufizuar 60 (gjashtëdhjetë) ditore, apo klientët që dalin për herë të parë në treg të liberalizuar për një periudhë 2 vjeçare, në rastet e mëposhtme:
- a. furnizuesi i mëparshëm, në përputhje me legjislacionin në fuqi, është në paaftësi financiare ose është në procedurë falimentimi, ose;
 - b. licenca e furnizimit të furnizuesit të mëparshëm i është pezulluar ose hequr përkohësisht;
 - c. klienti nuk ka arritur të gjejë një furnizues në treg.
- 3.3** Do të ketë një furnizues të mundësisë së fundit për të gjithë territorin e Republikës së Shqipërisë.
- 3.4** Furnizuesi i mundësisë së fundit blen dhe shet energji elektrike me çmime të përcaktuara sipas “Metodologjisë së përcaktimit çmimit të shitjes së energjisë elektrike nga furnizuesi i mundësisë së fundit”, miratuar me vendim të ERE.

NENI 4

HAPJA E KONKURIMIT

- 4.1** Konkursi shpallet dhe organizohet, nga Komisioni i përbërë nga kryetari i Komisionit dhe 4 anëtarë të caktuar me Urdhrin e Kryetarit të ERE.
- 4.2** Furnizuesi i mundësisë së fundit i propozuar nga Komisioni miratohet me Vendim të Bordit.
- 4.3** Anëtarët e Komisionit do të veprojnë në mënyrë transparente, të paanshme dhe jo-diskriminuese. Në rastet kur një anëtar i Komisionit ka ndonjë marrëdhënie private ose profesionale me një aplikant të njohur ose të mundshëm, ose nuk mund të sigurojë pavarësinë e tij/saj nga ndonjë aplikant i mundshëm, ai ose ajo do t'i sigurojë Kryetarit të ERE një shpjegim me shkrim dhe do të tërhiqet nga aktivitetet e Komisionit.
- 4.4** ERE, bazuar në kushtet e përcaktuara sipas pikës 1, të nenit 87 të Ligjit nr. 43/2015 “Për sektorin e energjisë elektrike”, i ndryshuar, cakton furnizuesin e mundësisë së fundit.
- 4.5** Furnizuesi i mundësisë së fundit emërohet për të ushtruar funksionet si furnizues i mundësisë së fundit për një periudhë prej tre (3) vjet në përputhje me VKM nr. 449, datë 15.6.2016 “Për

miratimin e kushteve dhe të procedurave për përcaktimin e furnizuesit të mundësisë së fundit të energjisë elektrike”.

- 4.6** Në rast se në përfundim të afatit të ushtrimit të funksioneve të furnizuesit të mundësisë së fundit, nga i licencuari i zgjedhur si i tillë, nuk është përzgjedhur furnizuesi për periudhën pasardhëse, ERE cakton një furnizues që të ushtrojë përkohësisht funksionin e FMF, për një periudhë jo më të gjatë se gjashtë (6) muaj, brenda së cilës do të zhvillohet një proces i ri përzgjedhjeje. Në rast se konkurrimi dështon, për shkak se nuk ka kandidatë konkurrues apo konkurrimi nuk jep rezultat, ERE duke marrë në konsideratë elementët e sigurisë, ekonomike, teknike dhe eksperiencën në aktivitetin e furnizimit, cakton FMF të përkohshëm me një vendim të veçantë, duke përcaktuar të gjitha termat dhe kushtet për vendosjen e detyrimeve të shërbimit publik. Të drejtat dhe detyrimet mes furnizuesit të përkohshëm të zgjedhur si FMF nga ERE dhe FMF në fuqi, sa i përket detyrimeve të pashlyera nga klientët që kanë përfituar këtë shërbim, janë ato të parashikuara në Rregulloren për ndryshimin e furnizuesit të energjisë elektrike.
- 4.7** Jo më vonë se 4 muaj para përfundimit të afatit të ushtrimit të funksioneve si FMF të licencuarit të caktuar si FMF, ERE do të zhvillojë një procedurë të re konkurrimi.
- 4.8** Procedura e konkurrimit e parashikuar në këtë nen, do të jetë në formën e një ftese për konkurrim që i drejtohet të gjithë të licencuarve për ushtrimin e aktivitetit të Furnizimit.
- 4.9** Ftesa për konkurrim që do të përgatitet nga Komisioni do të përmbajë këto informacione dhe kërkesa për dokumentacion:
- Datën dhe kohën kur do të zhvillohet procedura e konkurrimit si dhe procesi për paraqitjen e aplikimeve, si dhe oraret dhe datat e tjera të rëndësishme për procesin e konkurrimit;
 - Shërbimet që kërkohet të kryejë një kandidat për FMF, përfshirë fillimin e shërbimit dhe kushtet e tij;
 - Kriteret kualifikuese që duhet të plotësojnë subjektet që kanë të drejtë të jenë FMF;
 - Kriteret që ERE do të zbatojë në vlerësimin e ofertës më të mirë të cilat do të bëhen publike në faqen zyrtare të ERE.
- 4.10** Komisioni do t'i informojë aplikantët për vendimin e tij për refuzimin e aplikimit për përzgjedhjen si FMF, brenda pesëmbëdhjetë (15) ditë kalendarike nga data e paraqitjes së aplikimeve. Jo më vonë se 10 ditë kalendarike nga përzgjedhja e ofertuesve që kualifikohen për të vijuar procesin, Komisioni do të vijojë me renditjen e kandidatëve sipas pikëzimit nga më i larti te më i ulëti dhe i propozon Bordit përzgjedhjen e kandidatit të vlerësuar me më shumë pikë.
- 4.11** Bordi i ERE-s, brenda 5 ditëve nga paraqitja e propozimit nga Komisioni shprehet në lidhje me propozimin e Komisionit për përcaktimin e furnizuesit të mundësisë së fundit.
- 4.12** Vendimi i përzgjedhjes së FMF përmban një informacion të përgjithshëm mbi kriteret e vlerësimit të FMF së përzgjedhur, si dhe mbi kushtet e shërbimit të furnizimit të mundësisë së fundit.
- 4.13** Nëse një Aplikues nuk është i kënaqur me vendimin e ERE, për përzgjedhjen e FMF dhe/ose s'kualifikimin e tij, ka të drejtën e rishikimit dhe ankimit sipas legjislacionit në fuqi.

NENI 5

FAZAT E KONKURIMIT

- 5.1** Konkursi i cili do të shpallet nga Komisioni i ngritur me urdhër të Kryetarit të ERE do të përfshijë fazat e mëposhtme:
- a. shpallja e ftesës për konkursin e përzgjedhjes së FMF;
 - b. dorëzimi i dokumenteve të konkursit;
 - c. një vlerësim i dokumenteve të konkursit nga Komisioni,
 - d. shpallja e ofertuesve të kualifikuar dhe atyre të s'kualifikuar
- 5.2** Kushtet dhe afatet e secilës fazë të Konkursit, janë ato të parashikuara në këtë rregullore.

NENI 6

SHPLLJA E KONKURSIT

- 6.1** Procedura e Konkursit hapet me shpalljen e ftesës për pjesëmarrje nga Komisioni i ngritur për këtë qëllim.
- 6.2** Në çdo rast ftesa për Konkurs do të përgatitet nga Komisioni sipas Aneksit bashkëlidhur dhe do të publikohet në faqen e internetit të ERE, si dhe mediat kombëtare.
- 6.3** Ftesa për Konkurs duhet të përmbajë si më poshtë:
- a. bazën ligjore dhe kushtet e Konkursit;
 - b. hapat ligjore për procedurën e kualifikimit, përzgjedhjes dhe të përcaktimit nga komisioni i Konkursit;
 - c. Afatet e paraqitjes së dokumenteve të Konkursit;
 - d. fazat dhe afatet e procedurës së Konkursit sipas nenit 5.1;
 - e. dokumentacionin që duhet të dorëzohet nga aplikanti, sipas pikës 1, gërma e nenit 8
 - f. kriteret e vlerësimit dhe të përzgjedhjes sipas përcaktimeve të kësaj rregulloreje.
 - g. adresën për paraqitjen e dokumenteve të Konkursit dhe;
 - h. detajet e kontaktit dhe orari i punës i personit të ngarkuar me detyrën e dhënies së informacioneve që lidhen me konkursin.
- 6.4** Dokumentat e referencës të përgatitura nga Komisioni, i bashkëngjiten ftesës për Konkurs dhe do të paraqesin informacion të detajuar për Konkursin dhe aktivitetin që duhet të garantoj furnizuesi i mundësisë së fundit.

NENI 7

DORËZIMI I DOKUMENTEVE TË KONKURSIT

- 7.1** Të gjitha dokumentet e Konkursit të paraqitur në emër të një të licencuari nënshkruhen nga përfaqësuesi i tij i autorizuar.
- 7.2** Në rastet kur është e pamundur të sigurohen origjinalet e dokumenteve të kërkuara të Konkursit, aplikanti duhet të sigurojë kopjet e noterizuara.
- 7.3** Të gjitha dokumentet e Konkursit duhet të dorëzohen në gjuhën shqipe. Dokumentet e lëshuara në vendet e tjera do të vërtetohen nga një vule apostile dhe do të dorëzohen së bashku me përkthimin e tyre në gjuhën shqipe.
- 7.4** Afati i paraqitjes së dokumenteve të Konkursit (dita dhe ora) përcaktohet nga Komisioni i Konkursit dhe specifikohet në ftesën për konkurs, duke llogaritur një afat prej 15 ditë kalendarike pas datës së shpalljes së Ftesës për Konkurs.

- 7.5** Në çdo kohë përpara afatit të fundit për dorëzimin e dokumenteve të Konkursit, çdo aplikant i mundshëm mund të kërkojë me shkrim personit të përcaktuar në ftesën për konkurs për informacion shtesë mbi konkursin. Personi i përcaktuar për dhënien e informacionit shtesë të sigurojë dhënien e informacionit jo më vonë se afati përfundimtar i përcaktuar në pikën 4 të këtij neni. Informacioni para së të dërgohet, konfirmohet nga Komisioni. Kërkesat për informacion dhe informacionet e dhëna në përgjigje do të publikohen në faqen zyrtare të ERE-s.
- 7.6** Mënyra e dorëzimit të Dokumenteve të Konkursit do të jetë në formën e shpallur në ftesën për konkurs brenda afatit të përcaktuar në thirrjen për konkurs. Dorëzimi i vonuar i dokumenteve të Konkursit përbën kusht për s'kualifikim të aplikantit.

NENI 8

DOKUMENTACIONI I APLIKIMIT

- 8.1** Aplikuesi, për t'u caktuar si furnizues i mundësisë së fundit, në përputhje dhe me VKM nr. 449/2016 duhet të dorëzojë dokumentacionin, si më poshtë vijon:
- a. Ekstraktin e regjistrit tregtar, nga Qendra Kombëtare e Regjistrimit të lëshuar jo më vonë se 3 muajt e fundit;
 - b. Kopje të licencës për furnizimin me energji elektrike për të ushtruar aktivitetin në Republikën e Shqipërisë, të vlefshme për të paktën 3 vitet në vijim;
 - c. Përshkrimin e kapaciteteve teknike, organizative, profesionale dhe financiare të shoqërisë përfshirë pasqyrat financiare të audituara të 2 viteve të fundit;
 - d. Dëshmi të nevojshme (kontrata apo dëshmi të transaksioneve) që shoqëria shet blen dhe furnizon energji elektrike nëpërmjet transaksioneve përkatëse të tre viteve të fundit;
 - e. Dokumente, që vërtetojnë se personi juridik i ka plotësuar detyrimet fiskale dhe të sigurimeve shoqërore, lëshuar nga administrata tatimore jo më herët se 3 muaj nga momenti i dorëzimit;
 - f. Dokumentin që vërteton se personi juridik nuk është dënuar me vendim të formës së prerë, që lidhet me aktivitetin e shoqërisë, lëshuar nga institucionet përgjegjëse;
 - g. Dokumentin që vërteton se Drejtuesit e shoqërisë apo përfaqësuesi ligjor i personit juridik nuk ndodhet në ndjekje penale, lëshuar nga prokuroria;
 - h. Informacion të detajuar për aktivitetin e tij, bazuar në kërkesat e përgjithshme, të specifikuara në këtë Rregullore dhe veçanërisht:
 - eksperiencën e tij të mëparshme në aktivitetin e furnizimit dhe kategorinë e klientëve të furnizuar;
 - datën kur është i gatshëm për fillimin e ushtrimit të funksioneve të furnizuesit të mundësisë së fundit.
 - i. Dëshmi të sigurimit të ofertës.
- 8.2** Aplikuesi do të dorëzojë në ERE një kopje të sigurimit të ofertës. Dëshmia e sigurimit të ofertës do jetë e barabartë me vlerën 1.500.000 Lekë, të siguruar në një nga institucionet financiare që mund të ofrojnë këtë shërbim, me një afat vlefshmërie jo më pak se kohëzgjatja e procedurës për shpalljen e fituesit të zgjedhur sipas këtyre rregullave.

NENI 9

KRITERET PËR ZGJEDHJEN E FURNIZUESIT TË MUNDËSISË SË FUNDIT

- 9.1** Konkursi për emërimin e FMF do të konsiderohet i vlefshëm nëse jo më pak se dy (2) konkurrentë kanë përmbushur kriteret e pranimit.
- 9.2** I licencuari që ka të drejtë të jetë një FMF, duhet të jetë në gjendje të sigurojë prova për sa në vijim:
- Resurset administrative, teknologjinë e informacionit, sistemet e faturimit dhe burimet njerëzore me aftësinë për të transferuar një numër të madh të të dhënave të klientëve me përgjegjësi, me saktësi dhe në kohën e duhur, si dhe eksperiencat e mëparshme në fushën e furnizimit
 - Treguesit operacionale dhe financiare, të aftë të identifikojnë se cilëve klientë u shërbehen nën kushtet e FMF, dhe cilëve klientë në kushtet e një furnizuesi të energjisë;
 - Kapacitetin financiar për të furnizuar me energji elektrike të mjaftueshme shtesë, për të përmbushur kërkesat e klientëve që furnizohen në kushtet e mundësisë së fundit, pa cënuar shërbimin ndaj klientëve të tjerë me të cilët ka nënshkruar kontratë furnizimi.
- 9.3** I licencuari që dëshiron të jetë një FMF duhet të garantojë dhe dokumentojë që: Mund t'u shërbejë klientëve në kushtet e furnizimit të mundësisë së fundit, duke garantuar një Shërbim të vazhdueshëm për një periudhë prej gjashtëdhjetë (60) ditësh ose prej 2 vjetësh për klientët që kanë dalë për herë të parë në treg të liberalizuar. Për këtë qëllim depoziton në aplikim kontratat e lidhura gjatë 3 viteve të fundit të sigurimit të shërbimit të furnizimit.
- 9.4** I licencuari i cili aplikon për FMF duhet të dokumentojë eksperiencën në fushën e furnizimit me energji elektrike nëpërmjet depozitimit të minimumit të 5 kontrata furnizimi të lidhura dhe të realizuara me sukses të paktën në një vit.
- 9.5** Të gjithë furnizuesit që paraqesin aplikim të pranuar në afat ose para afatit të parashikuar në ftesën për konkurs e që demonstronë respektimin e kërkesave të përcaktuara në nenin 4 të kësaj rregulloreje dhe janë në përputhje me specifikimet e përcaktuara në nenin 5 të kësaj rregulloreje, do të konsiderohen në përputhje me kushtet e konkurrimit dhe do të kenë të drejtë të ofrojnë shërbimin e FMF nëse vlerësohen dhe shpallen fitues nga Komisioni. ERE njofton aplikantët e kualifikuar si dhe publikon në faqen zyrtare të saj, listën e aplikantëve të kualifikuar për konkurrim.
- 9.6** Aplikimi i paraqitur që nuk konsiderohet në përputhje me paragrafin 1 ose pranohet më vonë nga Komisioni, do të refuzohet/s'kualifikohet, dhe aplikuesi do të konsiderohet i papërshtatshëm për të qenë FMF si dhe gëzon të drejtën të informohet për këtë nga ERE duke dhënë arsyet për refuzimin e aplikimit.
- 9.7** Jo më vonë se 5 dite nga marrja dijeni për s'kualifikimin, i licencuari i s'kualifikuar ka të drejtë të ankimojë këtë vendim të ERE.
- 9.8** Në çdo rast që pranë Komisionit të vlerësimit paraqitet një kërkesë për rishikim të s'kualifikimit, Komisioni ia bën me dije Kryetarit dhe për shqyrtimin e kësaj kërkesë me

urdhër të Kryetarit ngrihet një grup pune i përbërë nga 3 anëtarë të ndryshëm nga ata të Komisionit të vlerësimit, të cilët shqyrtojnë ankesën brenda 5 ditëve pune, dhe informacionin e paraqesin në bord për shqyrtim.

NENI 10

VLERESIMI I OFERTUESVE TE KUALIFIKUAR

- 10.1** Komisioni i Vlerësimit i ngritur nga ERE, do të vlerësojë Furnizuesit që janë kualifikuar nga Komisioni në çdo rast bazuar në:
- a. Aftësitë e furnizuesit në lidhje me përmbushjen e detyrimit të Furnizimit si furnizues i mundësisë së fundit duke marrë në konsideratë eksperiencën e furnizuesit në treg dhe referencat përkatëse, kontrata furnizimi të realizuara me sukses, si dhe platformën për menaxhimin e Informacionit, lëshimin e faturave dhe arkëtimin e tyre, si dhe informimin dhe zgjidhjen e mosmarrëveshjeve me klientin;
 - b. propozimin e aplikantit në lidhje me alternativat për kushtet e pagesave;
 - c. kostot administrative me të cilat ofertuesi do të sigurojë shërbimin e FMF.
- 10.2** Secilit nga kriteret më sipër i korrespondojnë një numër pikësh si vijon:
- a. Aftësia e furnizuesit sipas gërmës A) maksimumi 50 pikë,
 - b. alternativat për kushtet e pagesës të propozuara nga furnizuesi sipas gërmës B) maksimumi 20 pikë dhe;
 - c. kostot administrative sipas gërmës C) maksimumi 30 pikë për ofertën me kostot më të ulëta.
- 10.3** Komisioni do të zgjedhë midis furnizuesve që kualifikohen për konkurrim, furnizuesin që ka ofertën më të mirë duke ofruar marzhin më të ulët të fitimit në krahasim me aplikuesit e tjerë.
- 10.4** Në kushtet e ofertave me pikë të barabarta do të vijohet me përzgjedhjen e fituesit sipas shortit të organizuar nga Komisioni mbi bazën e rregullave bashkëlidhur kësaj Rregulloreje.

NENI 11

PËRCAKTIMI I FURNIZUESIT TË MUNDËSISË TË FUNDIT

- 11.1** Bordi i ERE, pas paraqitjes së relacionit të argumentimit ligjor, ekonomik, teknik nga Komisioni, merr vendimin për caktimin e furnizuesit të mundësisë të fundit.
- 11.2** Nëse zbulon ndonjë shkelje të kërkesave që lidhen me procesin dhe kriteret e përzgjedhjes, Bordi mund të refuzojë kërkesën e Komisionit për miratimi të furnizuesit të zgjedhur të mundësisë të fundit. Komisioni duhet të përzgjedhë dhe të ripropozojë për miratim në Bord, përcaktimin si FMF të një nga aplikuesit që plotëson kriteret e përzgjedhjes të parashikuara në këtë rregullore.
- 11.3** Bazuar në vendimin e miratuar nga ERE, furnizuesi i zgjedhur i mundësisë të fundit caktohet të sigurojë furnizimin me energji elektrike të mundësisë të fundit në territorin e Republikës së Shqipërisë.

- 11.4** Vendimi për caktimin e furnizuesit të mundësisë të fundit publikohet në Fletoren Zyrtare dhe në faqen e internetit të ERE dhe furnizuesit të zgjedhur. Vendimi do t'i dërgohet Sekretariatit të Komunitetit të Energjisë.
- 11.5** Furnizuesi i caktuar i mundësisë të fundit publikon informacionin e nevojshëm për furnizimin me energji elektrike të mundësisë të fundit në faqen e tij të internetit dhe informon operatorët e sistemit të transmetimit dhe shpërndarjes. ERE do të specifikojë përmbajtjen e botimit të njoftimit.
- 11.6** ERE do të monitorojë dhe mbikëqyrë veprimtarinë e furnizuesit të mundësisë të fundit në përputhje me ligjin në fuqi. Sa më sipër, përfshin por nuk kufizohet, edhe në përcjelljen e çdo dokumenti që i nënshtrohet rinovimit, të përcjellë për qëllime të aplikimit për përzgjedhjen si FMF.

NENI 12

TË DREJTAT DHE DETYRIMET E FMF DHE KLIENTËVE QË FURNIZOHEN NGA FMF

- 12.1** Furnizuesi i mundësisë të fundit do të informojë ERE-në pa asnjë vonesë për ndonjë shqetësim në funksionimin e saj, pamundësinë ose rrezikun e pamundësisë për të kryer furnizimin e mundësisë së fundit.
- 12.2** Të drejtat dhe detyrimet e të licencuarit të përzgjedhur si furnizues i mundësisë së fundit dhe klientëve që përfitojnë këtë shërbim janë ato që parashikohen në *“Rregullat për kushtet e shërbimit të furnizimit nga furnizuesi i mundësisë së fundit, dhe kushtet kontraktore të furnizimit me energji elektrike”* të miratuara nga ERE.

NENI 13

DISPOZITAT PËRFUNDIMTARE

- 13.1** ERE ka të drejtë të ndryshojë ose modifikojë çdo dispozitë të kësaj Rregulloreje.
- 13.2** Procedurat për ndryshimin ose modifikimin e kësaj Rregulloreje do të jenë të njëjta me ato të miratimit.

NENI 14

HYRJA NË FUQI

Kjo Rregullore hyn në fuqi pas botimit në Fletoren Zyrtare.

Aneks 1

FTESË PËR PJESËMARRJE NË KONKURSIN PËR PËRZGJEDHJEN E FURNIZUESIT TË MUNDËSISË SË FUNDIT PËR NJË PERIUDHË 3 VJEÇARE

1. Ky konkurs zhvillohet në përputhje me nenin 86 të ligjit nr. 43/2015 “Për sektorin e energjisë elektrike”, i ndryshuar dhe VKM nr. 449, datë 15.6.2016, “Për miratimin e kushteve dhe të procedurave për përcaktimin e furnizuesit të mundësisë së fundit të energjisë elektrike”, si dhe Rregullores për përcaktimin e kriterëve të vlerësimit dhe të për zgjedhjes së furnizuesit të mundësisë së fundit, miratuar me Vendimin e Bordit të ERE nr. 141, datë 15.06.2021.
2. Konkursi shpallet dhe organizohet, nga Komisioni i përbërë nga _____
3. Dokumentat që duhet të paraqesë çdo aplikues:
 - j. Ekstraktin e regjistrimit tregtar, nga Qendra Kombëtare e Regjistrimit të lëshuar jo më vonë se 3 muajt e fundit;
 - k. Kopje të licencës për furnizimin me energji elektrike për të ushtruar aktivitetin në Republikën e Shqipërisë, të vlefshme për të paktën 3 vitet në vijim;
 - l. Përshkrimin e kapaciteteve teknike, organizative, profesionale dhe financiare të shoqërisë përfshirë pasqyrat financiare të audituara të 3 viteve të fundit;
 - m. Dëshmi të nevojshme (kontrata apo dëshmi të transaksioneve) që shoqëria shet, blen dhe furnizon energji elektrike nëpërmjet transaksioneve përkatëse të paktën të vitit të fundit;
 - n. Dokumente, që vërtetojnë se personi juridik i ka plotësuar detyrimet fiskale dhe të sigurimeve shoqërore, lëshuar nga administrata tatimore jo më herët se 3 muaj nga momenti i dorëzimit;
 - o. Dokumentin që vërteton se personi juridik nuk është dënuar me vendim të formës së prerë, që lidhet me aktivitetin e shoqërisë, lëshuar nga institucionet përgjegjëse;
 - p. Dokumentin që vërteton se Drejtuesit e shoqërisë apo përfaqësuesi ligjor i personit juridik nuk ndodhet në ndjekje penale, lëshuar nga prokuroria;
 - q. Informacion të detajuar për aktivitetin e tij, bazuar në kërkesat e përgjithshme, të specifikuar në këtë Rregullore dhe veçanërisht:
 - eksperiencën e tij të mëparshme në aktivitetin e furnizimit dhe kategorinë e klientëve të furnizuar;
 - datën kur është i gatshëm për fillimin e ushtrimit të funksioneve të furnizuesit të mundësisë së fundit.
 - r. Dëshmi të sigurimit të ofertës sipas legjislacionit në fuqi.
4. Kushtet që duhet të plotësojë aplikanti në konkurs :
 1. Aplikanti duhet të jetë në gjendje të sigurojë prova për sa në vijim:

- d. Resurset administrative, teknologjinë e informacionit, sistemet e faturimit dhe burimet njerëzore me aftësinë për të transferuar një numër të madh të të dhënave të klientëve me përgjegjësi, me saktësi dhe në kohën e duhur;
 - e. Treguesit operacionalë dhe financiarë, të afta të identifikojnë se cilëve klientë u shërbehen nën kushtet e FMF, dhe cilëve klientë në kushtet e një furnizuesi të energjisë;
 - f. Kapacitetin financiar për të furnizuar me energji elektrike të mjaftueshme shtesë, për të përmbushur kërkesat e klientëve që furnizohen në kushtet e mundësisë së fundit, pa cënuar shërbimin ndaj klientëve të tjerë me të cilët ka nënshkruar kontratë furnizimi.
2. Të garantojë dhe dokumentojë që mund t'u shërbejë klientëve në kushtet e furnizimit të mundësisë së fundit, duke garantuar një Shërbim të vazhdueshëm periudhë prej gjashtëdhjetë (60) ditësh ose prej 2 vjetësh për klientët që kanë dalë për herë të parë në treg të liberalizuar. Për këtë qëllim depoziton në aplikim kontratat e lidhura gjatë vitit të fundit të sigurimit të shërbimit të furnizimit.
5. Komisioni i Vlerësimit, do të vlerësojë Furnizuesit që janë kualifikuar nga Komisioni sipas pikavarazhit më të lartë në kriteret e mëposhtme:
- aftësitë e furnizuesit në lidhje me përmbushjen e detyrimit të Furnizimit si furnizues i mundësisë së fundit duke marrë në konsideratë eksperiencën e furnizuesit në treg dhe referencat përkatëse, kontrata furnizimi të realizuara me sukses, si dhe platformën për menaxhimin e Informacionit, lëshimin e faturave dhe arkëtimin e tyre, si dhe informimin dhe zgjidhjen e mosmarrëveshjeve me klientin - **maksimumi 50 pikë;**
 - propozimin e aplikantit në lidhje me alternativat për kushtet e pagesave - **maksimumi 20 pikë;**
 - kostot administrative me të cilat ofertuesi do të sigurojë shërbimin e FMF - **maksimumi 30 pikë për ofertën me kostot më të ulëta.**
6. Afati i fundit për dorëzimin e ofertës është data _____
7. Afati i fundit për shpalljen e fituesit është data _____
8. Aplikimet duhet të dërgohen në adresën postare të ERE _____ brenda orës 16.30 të çdo dite pune por jo më vonë se data _____.
- Nëse Oferta dorëzohet me postë, do të konsiderohet se është dorëzuar rregullisht brenda afatit të Dorëzimit të Ofertave nëse data e shënuar në vulën postare të Zarfeve, e konfirmuar me anë të njoftimit të shërbimit postar, është jo më vonë se Afati i Dorëzimit të Ofertave*
9. Jo më vonë se 5 ditë nga marrja dijeni për s'kualifikimin, i licencuari i s'kualifikuar ka të drejtë të ankimojë këtë vendim të Komisionit.
10. Për pyetje në lidhje me aplikimin adresojini në adresën email _____

ANEKS 2

PROCEDURA E ORGANIZIMIT TË SHORTIT, PËR SHPALLJEN E FITUESIT MIDIS KANDIDATËVE QË KANË MARRË NUMËR TË BARABARTË PIKËSH

Neni 1

Ky udhëzim ka për qëllim të përcaktojë rregullat që zbatohen për organizimin e shortit, për shpalljen fitues të kandidatëve që marrin numër të barabartë pikësh në konkursin për shpalljen e Furnizuesit të Mundësisë së Fundit.

Neni 2

Bordi i ERE-s merr vendim për organizimin e shortit për zgjedhjen e kandidatit fitues, në rast se dy ose më shumë kandidatë kanë marrë numër të barabartë pikësh. Vendimi përmban vendin, datën dhe orën e zhvillimit të shortit.

Neni 3

Mbledhja për hedhjen e shortit organizohet në seancë publike, jo më herët se 5 ditë dhe jo më vonë se 7 ditë pas marrjes së vendimit për hedhjen e shortit.

Neni 4

Sekretari i Përgjithshëm njofton për zhvillimin e shortit i cili shpallet në faqen zyrtare të ERE-s dhe në dy media të shkruara gjithashtu i bëhet me dije kandidatëve me pikë të barabarta.

Neni 5

1. Në datën dhe orën e caktuar për organizimin e shortit, Sekretari i Përgjithshëm i ERE sigurohet paraprakisht për praninë e kandidatëve përkatës dhe i fton ata të zënë vendet e caktuara.
2. Mosparaqitja e kandidatëve ose e njërit prej tyre nuk shtyn procedurat e shortit me përjashtim të rastit kur ndonjë prej tyre paraqet shkaqe të përligjura për mosparaqitjen. Në çdo rast shtyrja bëhet vetëm një herë dhe jo më vonë se 48 orë.
3. Në një enë transparente futen aq gogla sa është edhe numri i kandidatëve, pjesëmarrës në short.
4. Në secilën prej goglave futet nga një shirit letre ku në njërin prej tyre shënohet fjala "FITUES".
5. Radha e tërheqjes së goglave sipas pikës 3, bëhet sipas rendit alfabetik të emërimit të subjektit juridik që kandidati përfaqëson.
6. Sekretari i përgjithshëm i ERE fton me radhë kandidatët për tërheqjen e shortit.

Neni 6

1. Kandidati që e hap gogllën ia dorëzon Sekretarit të Përgjithshëm të ERE, i cili e lexon me zë të lartë dhe ua tregon të gjithë kandidatëve pjesëmarrës në short.
2. Pasi është tërhequr gogla me shënimin "FITUES", Sekretari i Përgjithshëm i hap me radhë goglat e mbetura në enë, nëse ka, lexon me zë të lartë përmbajtjen e fletëve dhe ua tregon ato me radhë pjesëmarrësve në mbledhje.

Neni 7

Në përfundim të procedurës së hedhjes së shortit, Bordi i ERE me vendim shpall rezultatin e shortit duke deklaruar kandidatin fitues.